



Broj: 02-04-53498-3/24
Sarajevo, 11.12.2024. godine

SKUPŠTINA KANTONA SARAJEVO
N/r Predsjedavajući Skupštine Kantona Sarajevo

PREDMET: Amandmani Vlade Kantona Sarajevo na prijedlog Zakona o elektronskom upravljanju u Kantonu Sarajevo

U skladu sa članom 151. i 152. Poslovnika Skupštine Kantona Sarajevo („Službene novine Kantona Sarajevo broj: 41/12 - Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22, 17/22 – Ispravka i 47/24), Vlada Kantona Sarajevo na **80. vanrednoj** sjednici održanoj dana **11.12.2024.** godine, zauzela je stav i podnosi sljedeće amandmane na prijedlog Zakona o elektronskom upravljanju u Kantonu Sarajevo, i to:

I VLADA KANTONA SARAJEVO PODNOSI SLJEDEĆE AMANDMANE:

1. Amandmani Vlade Kantona Sarajevo na prijedlog Zakona o elektronskom upravljanju u Kantonu Sarajevo

AMANDMAN I

U članu 2. stav (1) tačke m) i n) mijenjaju se i glase:

“m) informaciono-komunikacione tehnologije podrazumijevaju skup informaciono-komunikacionih programa, informatičkih i telekomunikacionih uređaja, bilo da su smješteni u Bosni i Hercegovini ili van njene teritorije, kao i metoda i postupaka primijenjenih u postupcima izrade, slanja, primanja, provjere i čuvanja elektronskih dokumenata.

n) jedinstveni informacioni sistem je informaciono-komunikacioni sistem kao skup programa, informatičkih i telekomunikacionih uređaja, bilo da su smješteni u Bosni i Hercegovini ili van njene teritorije, kao i metoda i postupaka primijenjenih u postupcima izrade, slanja, primanja, provjere i čuvanja elektronskih dokumenata.”.

O b r a z l o ž e n j e

Vlada Kantona Sarajevo predlaže ovaj amandman kako bi se definicije pojma "informaciono-komunikacione tehnologije" iz odredbe člana 2. stav (1) tačka m) proširila na način da se pod istim podrazumijeva skup informaciono-komunikacionih programa, informatičkih i telekomunikacionih uređaja, i u slučaju kada su isti smješteni van teritorije Bosne i Hercegovine. Također, na sličan način, proširena je definicija pojma "jedinstveni informacioni sistem" iz odredbe člana 2. stav (1) tačka n), na način da se pod istim podrazumijeva informaciono-komunikacioni sistem kao skup programa,



informatičkih i telekomunikacionih uređaja, i u slučaju kada su isti smješteni van teritorije Bosne i Hercegovine.

AMANDMAN II

U članu 16. dodaju se novi st. (2) i (3) koji glase:

“(2) Javni registri se mogu pohraniti i u informacionim sistemima smještenim u objektima, odnosno prostorima koji se nalaze van teritorije Bosne i Hercegovine, odnosno virtuelno putem usluga tehnologije oblaka (eng. cloud) koju mogu pružati i obrađivači, a sve pod uslovom da isti osiguraju dovoljne garancije da će biti ispoštovane obaveze po pitanju sigurnosti podataka te zaštite privatnosti, kao i pod uslovom da se ti objekti, odnosno prostori nalaze u državi koja primjenjuje adekvatne mjere zaštite ličnih podataka u skladu sa važećim zakonom i drugim propisima o zaštiti ličnih podataka u Bosni i Hercegovini, te propisima i standardima Evropske unije.

(3) Za posebnu kategoriju ličnih podataka se mora osigurati barem jedna sigurnosna kopija podataka u informacionim sistemima smještenim u Bosni i Hercegovini.”.

O b r a z l o ž e n j e

Zakon o zaštiti ličnih podataka („Službeni glasnik Bosne i Hercegovine“, br. 49/06, 76/11 i 89/11 - Ispravka) propisuje mogućnost prenosa ličnih podataka u inozemstvo, kao i uslove pod kojima se takav prenos može vršiti. Shodno tome, smatramo da je potrebno propisati zakonsku mogućnost da se podaci mogu pohranjivati i na informacionim sistemima koji se nalaze van teritorije Bosne i Hercegovine, uključujući i savremene oblak, odnosno cloud tehnologije, u slučaju da kapaciteti Zavoda za informatiku i statistiku Kantona Sarajevo ne budu dovoljni, a pod uslovima propisanim Zakonom o zaštiti ličnih podataka i drugim propisima kojima se uređuje ova oblast, kao i propisima i standardima Evropske unije.



Dostaviti:

1. Predsjedavajući Skupštine Kantona Sarajevo,
2. Skupština Kantona Sarajevo,
3. Zamjenici predsjedavajućeg Skupštine Kantona Sarajevo (3x),
- ④ 4. Sekretar Skupštine Kantona Sarajevo,
5. Premijer Kantona Sarajevo,
6. Ministarstvo pravde i uprave Kantona Sarajevo,
7. Evidencija,
8. A r h i v a.



Adresa: Reisa Džemaludina Čauševića 1, 71 000 Sarajevo
Tel: + 387 (0) 33 562-000, Fax: + 387 (0) 33 562-076
Web: <http://vlada.ks.gov.ba>, E-mail: vlada@vlada.ks.gov.ba

2/2